

## Presentât il program de 4<sup>e</sup> Conference regjonâl su la lenghe furlane

La Conference, clamade dongje ogni cinc agns dal Consei regjonâl e inmaneade de ARLeF, si fasarà ai 9 di Jugn, a tacâ des 14.30, tal Auditorium de Culture Furlane di Gurize

Al è dut pront pe 4<sup>e</sup> Conference regjonâl su la lenghe furlane. I details dal event, in program pai 9 di Jugn, a son stâts presentâts te sede di Udin de Regjon Autonome Friûl-Vignesie Julie. A jerin presints il president dal Consei regjonâl, **Mauro Bordin**, il president de ARLeF – Agenzie regjonâl pe lenghe furlane, **Eros Cisilino** e il diretôr de Agenzie, **William Cisilino**.

Il President dal Consei regjonâl, par meti in vore l'articul 30 de L.R. 29/2007 (*Normis pe tutele, valorizazion e promovion de lenghe furlane*, al clame dongje, almancul une volte ogni cinc agns e dut câs dentri dai prins vincjecuatrici mês di cuant che la legjislature e je tacade, une Conference di verifiche e di propueste su la metode in vore de leç su la tutele, valorizazion e promovion de lenghe furlane. La ultime Conference e jere stade fate tal 2021.

*«Se o volin tutelâ pardabon la nestre autonomie, o vin di partî de lenghe furlane: e je il cûr identitari dal Friûl e, se e ves di lâ al mancûl o se le pierdessin, o riscjaressin di pierdi la essence de nestre unicitât. Vuê lis istituzions a àn il dovê di sostignî in maniere decise la nestre lenghe, parcè che promovile al vûl dî invistî tal avignî culturâl e identitari de comunitât furlane. Al è intes scuclis e intes fameis, di fat, che si zuie la vere partide par trasmeti il furlan di une gjenerazion a chê altre – al à declarât il president dal Consei regjonâl dal F-VJ, Mauro Bordin –. O vin fat pas impuartants, ma al è di fâ ancjemò tant. La lenghe furlane e à di diventâ un imprest di ogni dì, presint intai media, intai servizis, te culture. Bisugne puartâ indenant une politiche linguistiche incisive e strategjiche, buine di fâi cuintri ae pression de omologazion culturâl. La Regjon e larà indenant a sostignî cun fuarce ogni azion che e coventi par valorizâ il furlan, parcè che la lenghe e la identitât a son une robe sole», al à zontât Bordin, riclamant il lavôr inviât tai ultins agns e ricuardant la responsabilitât des istituzions.*

*«La Conference e rapresente un moment di riflession, di valutazion e di propueste essenziâl pe lenghe furlane. Une des carateristichis plui impuartantis e je che ducj a puedin ufrî il lôr contribût par resonâ adun sul stât corint e su lis prospetivis futuris. O crôt che i concets fundamentâi a sedin chei de tutele e de valorizazion di une identitât*

### INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: [arlef@caltpr.it](mailto:arlef@caltpr.it)

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

*linguistiche che nus rint unics a nivel globâl; la ARLeF e à simpri fissât, tant che obietîf, l'ûs plen dal furlan in ogni fase di etât e in ogni situazion de vite. In particolâr, lis nestrîs energjiis a continuin a concentrâsi su la scuele, sul lavôr e su lis ativitâts publichis, setôrs dulà che o vin simpri operât cuntun scambi e un confront costants cu la Regjon, tant che o vin podût slargjâ lis nestrîs ativitâts ancje a cualchi universitât internazionâl e a cualchi Stât european, a pro di une politiche linguistiche simpri plui efficace» al à marcât il president de ARLeF – Agenzie regionâl pe lenghe furlane, Eros Cisilino.*

L'event, clamât dongje dal Consei Regionâl dal Friûl-Vignesie Julie e inmaneât de ARLeF, al è in program lunis ai 9 di Jugn, des 14.30 aes 19.30, tal Auditorium de Culture Furlane di Gurize (vie Rome 23) e al varà doi obietîfs: di une bande valutâ lis ativitâts di tutele e di promovion puartadis indenant intai ultins cinc agns; di chê altre, proponi gnovis azions pal disvilup de lenghe furlane.

Al sarà in chest contest, duncje, che si presentaran i risultâts otignûts tal ambit dal "Plan gjenerâl di politiche linguistiche pe lenghe furlane 2021-2025", par delinear lis strategjiis futuris pal disvilup dal furlan, cuntune atenzion particolâr ae Aministrazion Publiche, istruzion, tecnologiie, promovion sociâl e ai mass media. L'event al tacarà cui salûts istituzionâi di: Rodolfo Ziberna, sindic dal Comun di Gurize; prof. Gabriele Zanello, Diretôr dal CIRF de Universitât dal Friûl; prof.e Donatella Mosenghini, Referente pe lenghe furlane dal Uffici Scolastic Regionâl pal F-VJ; Eros Cisilino, president de ARLeF; Pierpaolo Roberti, Assessôr regionâl pes autonomiis locâls, funzion publiche, sigurece, imigrazion; Mauro Bordin, President dal Consei regionâl.

Aes 15, la conference e larà indenant cuntune serie di intervents, moderâts dal diretôr de ARLeF, William Cisilino, che a presentaran la situazion atuâl.

La prof.e Elena D'Orlando, ordenari di dirit aministratîf e public de Universitât dal Friûl, e tratarà dai "Struments de autonomie speciâl pe valorizazion e pe tutele des minorancis linguisticis daûr dal articol 18 de leç dai 15 di Dicembar dal 1999, n.482". Subit dopo, il prof. Vittorio Dell'Aquila, docent de Universitât dai Studis di Milan, al presentarà i dâts su la vitalitât de lenghe furlane, cjapâts sù cu la indagjin realizade dal IRES F-VJ, comissionade de ARLeF e previodude propit dal PGjPL 2021-2025. Il prof. Michele Gazzola, de Universitât dal Ulster, al fevelarà invezit di "Realizazion e ûs dal sisteme informatîf dal Plan gjenerâl di politiche linguistiche pe lenghe furlane 2021-2025".

A tacâ des 16, lis relazions si concentraran sul teme "Bande il gnûf Plan gjenerâl di politiche linguistiche 2026-2030", graciis ai intervents dal prof. Franco Finco, docent de Universitât Pedagogjiche de Carintie che al fevelarà dal "Corpus planning de lenghe furlane: situazion e obietîfs" e de prof.e Patrizia Pavatti, direttore dal Servizi istruzion de Regjon F-VJ, che e intervignarà su la "Tutele de lenghe furlane a scuele e intervents tal setôr de istruzion". Dopo di une piçule polse, i lavôrs a laran indenant cu lis relazions dedicadis a: Aministrazion Publiche, presentât di Veronica De Giorgio, dal Sportel regionâl pe lenghe furlane; media e tecnologiie, presentâts di Marco Torresin e Elena Zanussi, funzionaris de ARLeF. La zornade si sierarà prin cuntune discussion vierte al public, po cui salûts finâi di: Daniele Serгон, President de Assemblee de comunitât linguistiche furlane;

#### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF** CALT relazioni pubbliche / e-mail: [arlef@caltpr.it](mailto:arlef@caltpr.it)

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

Eros Cisilino, President de ARLeF; Pierpaolo Roberti, Assessôr regjonâl pes autonomiis locâls, funzion publiche, sigurece, imigrazion; Mauro Bordin, President dal Consei regjonâl.

Si podarà stâ daûr al event in presince o in direte streaming. Lis lenghis di vore a son il furlan e il talian. E je a disposizion la traduzion simultanie dal furlan al talian.

Par cui che al vûl partecipâ in presince a Gurize, la partecipazion e je gratuite fin che a son puescj disponibii (e si podarà domandâ l'atestât di partecipazion). La iscrizion, obligatorie, si varà di fâle online, doprant il [modul dedicât](#) disponibil tal sît [www.arlef.it](http://www.arlef.it), dentri di joibe ai 5 di Jugn. Cui che invezit al vûl viodi la conference in streaming, al podarà fâlu tal canâl YouTube de ARLeF, cun audio disponibil te version in lenghe originâl (talian e furlan), o tal sît dal Consei doprant il link [www.consiglio.regione.fvg.it](http://www.consiglio.regione.fvg.it).

Il program in detai de Conference al è a disposizion tai sîts dal Consei Regjonâl e de ARLeF.

Lis fasis di ideazion e di coordinament pe realizazion de Conference a son stadis garantidis di une Cabine di regjie, cun a cjâf il President dal Consei Mauro Bordin e componude dal Consei Regjonâl dal F-VJ; de ARLeF; dal Assessorât regjonâl pes autonomiis locâls; de Assemblee di comunitât linguistiche furlane; de Universitât dal Friûl; de Direzion centrâl autonomiis locâls, funzion publiche, sigurece e politicis de imigrazion e Servizi lenghis minoritariis e corejonâi intal forest; de Direzion centrâl lavôr e Servizi istruzion; dal Uffici scolastic regjonâl.

Udin, ai 26 di Mai dal 2025

#### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF** CALT relazioni pubbliche / e-mail: [arlef@caltpr.it](mailto:arlef@caltpr.it)

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<<<